

鹤鸣公赠匪石公迁湘序

夫人之有祖父也犹木之有本水之有源也培其本则枝必茂浚其源则流必长此语也人能知之而能确然行之者寡矣夫知之而不能行与不知者同也行之而不能至与不行者同也此姚江之学知行合一之论也吾族自明德皇帝而后始受姓为理盖以官而得姓也殷紂之难利贞公避于穷谷食木子而得免乃改姓曰李元元皇帝出而李氏乃大著焉追惟二祖之盛德其后必有应运而与者此大唐鸿叶之所自始也迨至中叶乱臣接踵宗社几覆郭汾阳辈协心力以匡复于前我祖西平忠武王奋孤军以荡平于后功力虽同而难易之势霄壤矣且劳而不伐功而不居纯忠一德与汾阳先后相辉于史册是以唐之功臣若浑侍中马北平辈不数传而泯然无闻惟我西平之后遍九州四海莫不克承先志忠节理学文章事业垂誉无穷历久弥光者诚先王功德之所遗也此吾李之木本水源也吾族始祖以西平为一世至七世祖祖尧始居吉州卢陵之谷村宋时始解属于吉水元至正元年子选公寄籍于湘阴

西平之后复盛于湘阴者自 子选公兄弟始 子选于湘阴为一世谷村为二十六世今传至 匪石则三十六世矣 匪石为廉宪 近麓公之会孙富阳县令 景麓公之孙亦佐县令 法麓公之三子居常切切以睦族敦本为念往从邮筒中寄我以世系丙午余公车过洞庭欲览涵虚太清之胜道出三湘获晤 匪石昆仲知为名贤之后确有木本水源之思者留连十日不忍舍去今壬子正月朔六日 匪石不避雨雪毅然就道至谷村展省祠墓亦留连旬余而后返且录其本支十五世祖 景春公所上宋高宗皇帝万言封事及诸名贤题跋并奉 子选公母 黄孺人神主以归呜呼此其志行为何如哉岂徒有本源之思知之而不能行者此哉 匪石以经明行修贡于乡明岁当诚于廷年力方壮宜大有为于世者而其弟季莹亦笃学力行子姪十余辈英才蔚起将来李族之在湘阴亦如其在吉水此岂徒近麓之泽垂于无穷即先王而下且由此以益大矣余于 匪石之归也既赋诗以赠之犹觉余意之未畅也复伸纸信笔序而送之总以见吾两人水木之思有同然耳

康熙十一年壬子岁仲春花晨书于宝勅楼